

## Alrond id de maziki vols



Av vu oren de storij ov Alrond id de maziki vols ? Ne ? I ve retalo ja.

Verim, maziki volve ziv jok odia zi id za in mold. Cepo la se nerim anmozli par lu se mol krati in mazik. Id ekvos, wan u sul vols ren tra de fost, togan de raste id buce ki hi koj, ap de koj flev op stije in hel, id pos fal ru su ter; liente nom da stije falan stele. Pur, ekvos maziki volve asèm in de sociad humanis. Ov da ve so ni sag.

Unvos zivì be Kep Bertoari u seni kwalor we avì tri sone. Wan he mori, slogan de kosiùd, de senies son erdì de kastèl id tale tere, de midi son erdì de paroja id vidì prist de viki, id de junes, Alrond, becepì solem de spad hi patri id u seni kwal. De senies frat davì a Alrond u pezon pani id u canka id ordezi ho raito ap po ceko hi felij altia bedàl.

Predizan sia, Alrond menì: parkà ne ito a Adtiarn a de kort raji Taravon ? Da raj, un dez, paj bravi id baldi noble mol bundavim. Sim he itì do pol Adtiarn.

Wim tem itì pas, Alrond tanivì id famì, id sedì niz po jedo be liz u fosti. Id glade ! od berù u buc viburnu, uspunti de muzel u volsi. De vols speki Alrond, id Alrond de vols. Id de vols dezi ho:

- Bun dia to, jun man ! U leki canka tu av zi. Vol tu deto mo de favòr koparto u pez ?

Id obte Alrond avì nun alten jede usim da pan id canka, he sì u bunkarzi man, sim he davì a de vols u pez canku id somtemim retali ho wim hi frate avì treten ha id te he itì a a Adtiarn, a de kort raji Taravon.

- Skuc, dezi de vols, moz i os veno ki ta po proba mi cans ? Tu se u bun man, i viz, ba mol slimimenti, id i se mol usperijen in tale sorte trikis, id mojse i moz servo ta. Wan nu v'aveno in Adtiarn, tu ve inito in de gardad raji Taravon, id i ve vido tradezor po kanselor Berengar. I kon 3e mole lingas: Garegini, Adelnini, id oze de linga Igeruldis.

- Voj, dezi Alrond, sam su de vaj ve so glajes. Ven ki ma !

Sim lu itì a pol Adtiarn. Lu avenì za, id raj Taravon nemì ni Alrond in hi personi gardad, par de kapitan gardis sì dod longim u fram de moren patri de juni, id Alrond, in fas, karzad id inteligad somivi mol a hi pater. Id de vols stali sia in de kanseloria id suprizi tale ki hi konad lingus: de skribe, de koradore, de kanselor id de raj som vidi stonen id stumen ov de visad de volsi.

De raj avì u dota po mazò. Osprù te ce vizì Alrond, ce inliamì matim ki ha; id de jun man sì os ne eglifeli do de prinsa. Pur je stì in de rainia da kosiùd, te ne solem de prinsa som mozi ne uscepo u vedan slogan ci karz, ba te oze de raj, ci pater, mozi ne findo u maz po hi dota slogan hi siavi menad, wim je se de kaz in nerim tale rainias. Ba je dozi sto u gren korèn, id he we vid de vingor ve becepo de mand de prinsu. Id wim de prinsa sì po mazò, id sì de uni dota raji Taravon, id de raj som sì za in hi seni jare, de kanselor id koradore inizi intrubo ha pote he organiz u korèn beprù, id dav hi dota a mazò.



- Nu vol, lu dezi, u siedi posslogor po va - u glori, valtàn, inteligan prins o kwalor, valti in tale mode; nu nud ne un alten sort raji.

De raj dozi apdavo id organizo u korèn. Alrond ruvenì od hi serviz ze tristi, id de vols pragi ho:

- Parkà se tu tristi, mi fram, parkà sem tu sa disperen ?

- Kim ne so disperen ? ruvokì Alrond. De raj av anonsen u korèn, id de vingor ve becepo de mand de prinsu id mi liama ve ito a un uslandi prins.

- Id tu, parkà partinèm tu ne in de korèn ? pragi de vols. Obte ti pater sì u pavri kwalor, id tu se jok maj pavri, ti famil se pur nobli id os veti te daz alten rajis. Idmàj tu se polen ki krat id ingenij.

- Sim je se, dezi Alrond, ba i fel te de usprobe ve so disemi a wa i se siuden: nè kambo ki spike, nè stiro ki bogel, nè fugo spadim.

- Ba se i ne ki ta ? pragi de vols. I ve eldo ta po kofaso de raji usprobe.

Alrond tramenì u poj, id pos kovenì. Id de vols vegì hi koj id su de jun man falì gori stije. Id obte Alrond avì sen bel dafòr, id baldi wim poje, num he sì tal cijan ki u maziki luc, id he avì de krat trides krati manis.

Wan venì de tem de koreni, in Adtiarn avenì raje, prinse, duke, grefe, baròne id kwalore od tal de Westi Kust, id eke oze od de isle d'Arkipelu ! De tri pri dias pasì in turnire, cage id festijede, id in tal Alrond subepasì tale alten straniore id kwalore: in spikikambe, spadikambe, bogli id krosibogli stire, he dansì os bunes te tale id beduti sa korticim - wim u veri vedan u prinsu ! Ba de raji usprobe sì maj anlezi te kortidanse.

Je vidi de tem de pri usprobi. Id de raj dezi:

Fori jar duk Larhelm od Moremont kodavì mo mirvizi sieme, we dav u krop pinsunte suntalis, id de pan od da gorn av sule mirvizi siavide te u miki pezit sat po nuro u gresen man. Mi campore siemì di mirakli grin in polde, id verim de mesad sì polni wim nevos dafòr. Pur, je ste solem u problèm: ekun ven nocim id jed de gorn. Id wan i send garde po cepo de ankonen robor, lu tale insòp. Ke od va, glori kwalore, ve protego mi polde mirakli gorni, id somtemim cepo id apero mo de misteric robor ?

Tale raje, prinse, duke, grefe, baròne id kwalore sì pervirten, id pervirten sì os Alrond. He itì ru dom id retali a de vols ov de raji misiòn. Id de vols dezi:

- I zav ke rob de gorn - je s'de trombi monstor. Skuc ma, it sopo bun id nocim nu ve ito vato de robor. Solem, oblàs ne obtopo ti ore.

Sim lu deti. Id wan nocim tale raje, prinse, duke, grefe, baròne id kwalore itì us po gardo de polde, de trombi monstor aneri lo id zoni hi tromb - davos tale insopi. Ba Alrond avi obtopen hi ore, wim de vols avi dezen ho, sim he insopi ne. Osprù te de robor inizi pastijo su de raji polde, de vols dezi a Alrond « num, cepem de trombi monstor ! » Longim lu mozi ne subvaldo ha, tis de vols spriti su ha id basi u kord aròn ha.

Be de morna, Alrond aperì de trombi monstor a de raj; de raj si supriren id lobì id daski Alrond. De uslandi raje, prinse, duke, grefe baròne id kwalore vidì malim invidi, par lu sopi be tal noc trawàn Alrond id de vols cepi de monstor. Id lu komploti malim gon Alrond, ane pur diko ja.

De tem veni po de duj uspròb. Id de raj dezi:

- Fori jar, raj Etelstan od Damiria kodavi mo u herd goriviladi ovinis. Num je se tem skiro la. Li vuln se puri gor, ba i doz dezo te da ovine se mol apfrajic id tis num nekun av ustelen skiro la. Ke od va, glori kwalore, ve mozo skiro de ovine, kosamo de gori vuln id apero ja mo ?



Tale raje, prinse, duke, grefe, baròne id kwalore si pervirten, id pervirten si os Alrond. He itì ru dom id retali a de vols ov de raji misiòn. Id de vols dezi:

- Di se ne anlezi, Alrond, mi fram. Skuc ma, sop bun di noc id domòr nu ve ito skiro de ovine ki gori vilad.

De morna veni, de protensore a de mand de prinsu probi cepo de goriviladi ovine, ba wim de ovine si mol apfrajic id speli, nekun usteli koto oze u tuf gori vulni od la. Befènd veni de vos Alrondi. Davos de vols, hi feden fram, sedi niz su de koln wo de ovine si pastijan, nemì us u flut id inizi jego. Oh, is vu mozev solem imajino ka bel si da muzik ! Tale ovine insami aròn de vols id skuci wim asaren pa de maziki muzik, id num je si lezi po Alrond skiro la.

Id ne solem de ovine vidi insaren! De klar, puri zone insari os de raj, de kortisane, de swita, id tale we si za. tale vidi silan id skuci wim stumen. Vilgi fosti tiere veni us li pore id tianas po skuco de mirvizi muzik de volsi. Liov, de raj tale bestis, vozi ne gromo od fraj intrabreko de magibèl muzik, vulp oblasi hi jule id uròks hi raugè. Oze seni Greta, we zivi be Brek-in-de-Grovia id si famos po avo de maj mali karaktir (ce mozi ne stajo un minùt ki altene ane bramo la), sim oze seni Greta som veni us in de klaria id skuci inmuven. De melodij wen de vols traji us hi flut traviri tal aròn sia in u tempel muziki.

De raj si entusiastu te Alrond avi apolnen de duj task id duplim entusiastu od avo oren u sul maziki muzik. He daski verfelim Alrond id de vols, ba de uslandi raje, prinse, duke, grefe, baròne id kwalore nerim skalti od invid id irgad. Id un od la, raj Gerneb od Lothirod, dezi:

- Is da kwalor ving os de trij uspròb, he ve becepo de prinsa, id nu ve ito ap ki nit id oze skanden par ek pavri soldat ve diko sia holes te nu, kronen kebe ! Nu ve inbuco ha domòri morna for de trij

uspròb id tudo ha, id sim nu ve ne udìto dihonòr.

Lu becizì deto da. Ba lu zavì ne te de vols sù stan berù u kortin be da tem id orì ze tal. He itì ru dom id retali a Alrond ov de traitic plane de uslandoris.

- Ka ze deto ? pragì de jun man.

- Fed ma, ruvokì de vols, ba solem rumèn te domòr nu ve nudo obe vikto ni fense id vingo de posni uspròb !

De tem venì po de trij, posni uspròb. Id de raj dezi:

- I vol te mi futuri mažisòn invìt ma a u luksi festijed in hi siavi kastèl. Las solem de procepad so raji ! I ve ne davo mi dota a u bedigor.

De uslandi raje, prinse, duke, grefe, baròne id kwalore vidì alarmen. Naturim in li lande lu avì magibèl palaze id kastele, ba lu mozi nè duto de raj za in un dia, nè apero de palaze id kastele a Adtiarn, enikà dar sev li sfore ! Pur de kwer rices raje innemì jakun sunte murore id ordezi lo struo ze suprù kastele ner de kebipol, ba verim moz un struo u kastèl in un dia ? Alrond sù os tristi, ba de vols alkodì ha id dezi:

- I v'ito findo to u kastèl po de raji fest, id tu, pocèr wan tu it cago num, id staj dal od uslandore !



Id de vols renì do Kastèl Kromorgan. Un doz dezo te da kastèl sù poseden pa u stragi trol, mali-uvemali, krual-uvekrual. Mole itan pas kastèl Kromorgan fendì li žive intra de dante da ankopaini ogori. Ba de trol jedì liente, ne volse, pardà ni lusin avì nit a frajo; idmàj be da tem de trol sù ne be dom: he avì iten cago. Prim od tal, de vols becizì deto ap ki de servane de troli, gardan de kastèl: gnol Graw, gobol Grow, id gremlin Grahaham. He arenì a de vort id klaji:

- Sav sia we moz! Zi ven de raj ki hi armid id he adùt ki sia sunte sarane: lu ve usbreno va ki flize!

De servane de troli vidì alarmen. Ka ze deto ? Id de vols dezi lo:

- Cele va spel: mojse de raj id hi armid id hi sarane ve ne bemarko va !

De servane de troli sù kuvardi, pardà, ane varto un minùt, lu lasì li gardipostas. Gnol Graw celì sia in u biri but, gobol Grow in u vini but, id gremlin Grahaham celì sia in u kalvadosi but (de trol gusì ze mol kalvados). Davos ni vols kluzì la tale, roli la us su de mur de forti id basì la in de grovia - las lu sniv za !

Midwàn ruvenì de mali trol, de domimastor, id vidì ne poj surprizen vizan te hi servane avì disvanen, id jok te u strani vols avì asemen od nekia in hi siavi kastèl. Ba ni vols sì, be de holes punt, u kortic id bun-maniren sior, sim je sì ne ho anlezi insaro de trol. Zavan te de trol gusì ze mol flatad, de vols inizi beskribo in tale mozli mode de beservade de troli id de glor wen he avì in tale beronan rainias.

Un doz dezo te di trol avì du kebe, we greli molvos ki unaltem. Id di se wa de vols usmenì: he davì anstopim maj id maj floric komplimente a un, pos a d'alten keb, tis fendim lu greli samòl te lu grabì unaltem in u morli kamb. Davos de vols slizì sia sovim za, wo de trol garì skerpi kurvi sable, wim daze uzen pa kamelore po kambo in vustia, id ki u destic plag he kotì ap obe grimic kebe de mali troli. Dod davos nekun maj kaptì id tudì vaizore in de aria.

Midwàn raj Taravon sì cagan ki hi kortisane, hi swita id de uslandi raje, prinse, duke, grefe, baròne id kwalore we, wim vu rumèn, inteli tudo Alrond. Proslogan de cirv, Alrond brekì ap tal de swita id stajì solen; davos de uslandore inizi proslogo ha. Lu avì trajen us li spade, kargen li krosibogle, id je avev sen de fend de jun mani... ane de vols !

De vols, pos avo nemen vald de magibel kasteli de mali troli, id ordezen predizo u verim raji festijed za, hastì a de fost wo de cag sì proitan. In da tem je stì u mol seni, krumic pont in de fost. Sim, wan de fense sì za rutogan Alrond id inizi stiro su ha ki krosibogle, de vols - id he sì ze u maziki vols ! - in poj tem travirì hi fram in de form u volsi id celi ha in u por, id de vols som virì sia in u jun man, sa somi a Alrond te un mozi ne dissigo la ! De uslandi raje, prinse, duke, grefe, baròne id kwalore racì pos ha, id de vols in de form Alrondi spritì niz hi kwal id renì tra de seni pont a de alten ber. De uslandore, menan te li viktim sì in li mande, racì pos ha su de krumic pont id de pont disfali, sim tale peritì.



Midwàn de raj famì id varti hi jedad. De vols travirì ru Alrond in hi human form, id sia som in hi volsi form, id lu ruvenì a de raj.

- Vi Magistad, dezi de vols ceremonim, mi Sir Alrond av de honòr invito va po jedo in hi kastèl.
- Kim, Alrond ? pragi de raj surprizen, de kastèl ti patri se des dias raitadi ap zi, idmàj je potèn, pa reg prigenadi, a ti senies frat.
- I asiur Vo, Vi Magistad, de vols hastì dezo, te Sir Alrond av u kastèl, id de maj magibèl !

Id de vols dutì Alrond, de raj, id tal de raji swita a Kastèl Kromorgan, we jok kurtim for poteni a de mali trol, id num poteni a de fram de volsi, kwalor Alrond. Wan lu atogì de kastèl, de raj sì uveglàj par kastèl Kromorgan sì os bel te u raji palàz; id de festijed wen de vols id Alrond provitì a de raj id hi swita sì os geniverim raji. De raj sì kopolem insaren id be de som jedad anonsì de nuvad Alrondi ki de prinse, id os nomizì Alrond erdor de troni.

Id ka ov de maziki vols ? Wan de vedad sì fenden, de vols nemì apciz id renì ap a de fost, pos tal he sì jok u vilgi best, obte maj posen he venì ekvos vizito hi fram.

Sim je se, mi frame! Alrond dispartì hi posni nure ki de vols, id fendim he vidì u raj.